



**Rabu, 15 Desember 2021**

**Ogen: Josua 24: 15**



**Mimpin Jabu**



**B**apa eme profil si ibanggaken bas tengah-tengah jabu. Bapa mahanca maka kerina profil bas jabu meherga jadina. Bapa si mediate, erkeleng ate man jabu tuhu-tuhu jadi kebanggan man anggota keluarga. Bapa si mimpin jabu alu mehuli tuhu-tuhu jadi teladan/usihen anak-anak ipupusna. Bapa pe iarapken banci mabai jabu guna erkemalangen man Tuhan. Melala tokoh-tokoh i bas Pustaka Si Badia ncidahken peran dilaki jadi penting i bas kiniteken enda. Bage ka me oratenta sendah enda e me Josua. Ia pe bapa i tengah-tengah jabuna, bahkan pemimpin i bas sada bangsa (Israel). Ia labo pemimpin si otoriter, ia ngergai kalak si deban. Bahkan ia mereken pilihan. Tapi isaksikenna lebe kegeluhenna enggo jadi usihen dengen patut guna itiru eme kesetianna nandangi Tuhan.

I tengah-tengah kegeluhen bangsa Israel si "jatuh bangun" erkiniteken nandangi Dibata. I tengah-tengah kegeluhen si mawen labo setia nandangi Tuhan, i je me isi pedah si perpudi isehken Josua enda. Tuhu-tuhu enda hal si penting iakap Josua, sabap i babo kerina si iperluken bangsa e, erkiniteken man Dibata me si utamana.

Apakah Mamre-nta enggo banci ikataken pemimpin Moria?

Apakah Mamre-nta enggo jadi usihen Moria?

Apakah Mamre-nta enggo banci mabai jabunta erkemalangen man Tuhan Dibata?

Bicara lenga gia, labo e dalanna menyepeleken ia, tapi si dukung ia gelah ia banci jadi pemimpin si mehuli dengen si patut i tengah-tengah jabu. Amin gia melala kebutuhen, melala si man aturenken i bas jabu, si mehulina nginget kita Dibata eme nomor sada i bas kegeluhenta selaku kalak si erkiniteken nandangi Dibata. Maka kerina si perlu man banta itambahkan Tuhan man banta. Amin